

Dirk Dumfries di MEP:

E HISTORIA REAL DI E FECHA 18 DI MAART

ORANJESTAD (AAN): Aruba ta celebra 18 di maart su dia nacional, esta e celebracion di dia di himno y bandera. Durante e ultimo añanan intencionan diabolico a worde haci pa falsifica e historia real di e celebracion aki. Constantemente ta worde haci como si fuera cu e fecha di 18 di maart ta relata exclusivamente na aña 1948 te cu fecha cu e pueblo Arubano kier lubida mas liher posibel pasobra e fecha aki ta relata na e fecha aki a worde introduci dor di partido AVP.

Sin embargo e fecha di 18 di maart 1948 ta un fecha cue pueblo Arubano kier lubida mas liher posibel pasobra e

fecha aki ta marca cu e tracion di e siglo aki, esta e tan afamado cadena di esclavitud di 12-8. Alavez e fecha aki ta relata na e discriminacion y segregacion cu tabata reina e temponan ey, na momento cu famianan honrado y decente cu a contribui grandemente na e desaroyo di e pueblo Arubano no a haya e oportunidad na 1948 pa pa por firma e mocion cu a worde entrega na Hulanda.

E famianan aki no a bin na remarke pa firma e mocion pa motibo cu nan antepasadonan a bin for di otro islanan den Caribe y pa parti di AVP nan no a worde considera mes como Arubiano. Contrario na

e actitud discriminatorio aki Aruba a conoce partido prestigioso MEP cu semper a boga pa union di e pueblo Arubano. E motibo principal cu Libertador Betico Croes y MEP a scoge e fecha di 18 di maart na 1973 ta puro casualidad.

Den e siman promer cu e fecha 18 maart 1973 tabatin delegacionnan parlamentario di Hulanda y Antiyas di bishita na Aruba pa reunionnan importante encuanto e futuro estatal. E temponan ey Betico y su partido MEP tabata kier a demostra na e parlamentarionan hulandes y antiyano cu e deseo di e pueblo di Aruba pa un status

autonomo ta biba te den profundidad di e curason di e pueblo. Den e siman ey Betico y su partido MEP tabata desea di pone miles di hende riba pia den un manifestacion masal y a unico dia apropia pa logra esaki tabata riba un dia liber, esat riba un diadomingo y cu pa casualidad e cay riba e fecha di 18 di maart 1973. Miles y miles di Arubiano y otro nacionalidadnan biba na Aruba a acudi na e manifestacion masal aki den Wilhelminastadion pasobra MEP no tabata haci distincion den descendencia di tur esnan cu a acudi na e causa nacional aki. For di temponan ey Betico y su partido MEP a considera e fecha aki como un fecha historico, esta un fecha riba cual e pueblo Arubiano pa promer bez a uni den un solo causa sagrado.

Pa celebra e fecha historico aki partido MEP a organisa dia 18 maart 1975 un grandioso marcha di libertad cu a pasa den e cayanan di Oranjestad. Pa por logra union total den e pueblo Arubano y consecuentemente e Status Aparte tan anhele Betico tabata convenci cu mester introduci e simbolonan di libertad, esta himno y bandera. Betico tabata stima su pueblo. Betico su vision tabata unico y e a nase cu un don pa structura estatal. Tabata hustamente e lider actual di MEP sr. Nelson Orlando Oduer como deputado

di cultura a percura pa e himno y bandera bira realidad. Ta increibel y un acto traicionero con e partido AVP a vota contra e introduccion di e himno y bandera Arubiano terciendo e ponencia ridiculo padilanti cu e e colornan cora y geel den e bandera di Aruba ta di partido MEP. Alavez e dirigentenan di AVP a ridiculisa e ultimo couplet di e himno di Aruba bisando cu e palabra "libertad" den e couplet a sali for di seno di MEP, pasobra e temponan ey e partido AVP tabatin berguensa pa usa e palabra "libretad".

Pa MEP e fecha di 18 maart ta e dia nacional di Aruba den cual ta recorda alavez e manifestacion masal den Wilhelminastadion na 1973, e marcha di libertad na 1975, introduccion di himno y bandera na 1976 y finalmente e logro di Status Aparte di cual partido MEP conhuntamente cu e pueblo Arubano ta arquitecto, constructor y realizador di e causa sagrado aki.

Cualquier otro interpretacion di e fecha di 18 maart ta worde considera como un trocemente di historia y falsificacion brutal di e historia real di e lucha pa Status Aparte. Mi ta haci un yamada na nos digno y culto pueblo Arubano pa his bo bandera na cas, na bo oficina of ariba bo boto. Ser orguyoso cu bo ta un Arubiano y ta forma parti di nos sociedad. Pabien Aruba y pasa un feliz dia.